

❖ YR AMLENNI COCH

Deufis cyn y Nadolig  
anfonwyd amlen ac arni eiriau coch  
i filoedd lawer drwy'r wlad –  
neges Gŵyl yr Adfent:  
'Credwn mewn byw cyn marw.'  
Nid digon dweud wrth blant y Trydydd Byd  
bod bywyd yn eu haros sy'n llawer gwell  
y tu hwnt i'r bedd.  
Ni chafodd y newynog a dioddefwyr Aids  
y fraint o fywyd llawn  
cyn ymadael â'r byd hwn.  
Diben yr Adfent yw ein paratoi  
i gofio geni Crist,  
yr Emanwêl –  
Duw gyda ni.  
Pa fodd y medrwn ni fod gyda Duw  
os anwybyddwn  
'un o'r rhain ei frodyr lleiaf'  
sydd eisiau'r hawl i fyw cyn mynd o'r byd?